

道脈源流
濟度原始
合編

道脈源流

星樵樂應禮原編


道有原乎。吾不得而知也。天地有壞。大道不壞。諸恆河沙世界而道如是也。由一元會溯諸無量數元會而道如是也。若欲探其原始。雖大撓衍甲子。隸首持算策。其術亦有所窮。然則道果無原乎。吾亦不敢妄斷也。但以今之世界言之。洪濛之初。渾渾淪淪。廓然太虛而已。未幾而天開。未幾而地闢。未幾而人物滋生。由是而倫常禮教。及物質之文明。次第開化。孰爲之。道爲之也。道爲之而所以主宰此道。默運神化。斡旋於無聲無臭之際。開宗系脈。流傳於無既者。必有至大至尊之神。握其樞而提其權。吾無以名之。曰太上。太上隱顯

變化。不可測識。在上古首化三清。天皇時爲萬法天師。地皇時爲立中法師。人皇時名堅固先生。三皇後名金闕帝君。伏羲時爲鬱華子。神農時爲九靈老子。帝嚳時爲祿圖子。堯時爲務成子。舜時爲尹壽子。夏禹時爲真行子。商湯時爲錫則子。至武丁時始降全神爲老子。老子傳文始。文始傳麻衣而開隱仙派。文始傳少陽。少陽傳正陽。正陽傳純陽。純陽傳重陽而開北派。傳海蟾而開南派。其正宗之派。正陽之後。有孝悌王。以及諶母。旌陽。樵陽。元吉。三丰。宏願。圓通。此皆歷代之仙真。自商周以迄元明。載在往籍。班班可攷者也。逮清道光。譚子貫源。遙接薪傳。創教於龍女寺。道闡後天。黎子真繼。

之。是謂庚子老道場。後有陳希真吳明德羅無生三師。替天存道。恁怨恁勞。赴湯蹈火。一德一心。傳燈圖所稱全終子。卽此三師之公號也。至仙舟李祖出。棄官入道。亦系脈成真。延及光緒末造。有執陽宗師。領詔三天。道闡龍沙。壇承三教。於光緒丙午。在巴縣淨慈寺續開救生壇。功成奉詔上昇。寄脈於慧清王師。嗣於民國壬子年。繼紹遺志。建道統於香雲山。壇立明德止於斯民明道明善五堂。道分嫡庶繼續遺五派。本期宏啓規模。大彰教化。奈壇道兩方學者。竟意見不一。致遭魔考。道遷西湖。詔命撤消。賴中皇暨列祖懇恩。玄窿始劃分爲西南兩派。將嘉凌之分壇明道院。勅賜名傳度道場。西派闡度

已往。傳度系脈。歲癸亥。成都金沙寺三天樓殿落成。賜名明道總院。越丙寅。傳度雖屆限滿。南派濟度開舟。然因尙在彼此交接之會。仍設分號於明道總院。爲西南辦公之總地。天心一體眷顧。已可顯見。惟考龍沙道派。有二十字。曰。執慧真常應。至靈守在心。一元來復本。萬世永長存。混元註冊。天榜留名。度盡十萬靈根。還原返本。俾玉清脈派。歷萬萬混沌大劫而流傳不墜。斯列祖度原之心。庶幾稍慰乎。

附道脈源流圖



道脈源流

道旨

有天地然後有萬物。萬物之中。惟人最靈。書曰。惟皇上帝降衷於下民。厥有恆性。春秋傳曰。民受天地之中以生。所謂命也。禮云。人也者。秉天地之德。陰陽之交。鬼神之會。五行之秀氣也。起世因本經云。刼初以來。一切人類。皆從光音天而降。孔子繫易。以人與天地並稱爲三才者。誠以人爲萬物之靈也。此靈由無始刼前護持涵育。不知經幾千億年。混元一炁。與太虛同體。是曰元靈。既降誕爲人。離居塵世。勢不免爲氣數所乘。墮落日久。靈性汨沒。貪嗔癡愛。流浪生死。欲其飛昇帝鄉。蓋亦難矣。加以世風不古。彝倫攸斁。乖戾之氣。

上干天和。而水火刀兵瘟疫饑饉諸災。紛紛告警。謂之刼簸。靈寶天地運度經云。天厄謂之陽九。地虧謂之百六。原人值此陽九百六之厄。如大海翻波。萍飄蓬泛。不知津涯。又如火炎崑岡。玉石俱焚。詎不痛哉。夫含生負氣。皆有靈智。蠢動翹翔。咸知畏死。聖賢以仁愛爲先。仙佛以慈悲爲本。一遇大刼將至。必思設法以救濟之。此挽刼度原。所由領旨而開舟也。試以中國往事徵之。三代以前。道在君相。民風渾樸。故康衢之叟。忘帝力於何有。卽童子歌謠。亦曉然於不識不知。順帝之則。復乎尙矣。三代以後。淳澆樸散。禍亂斯興。上無道揆。下無法守。伊尹相湯以放桀曰。予將以斯道覺斯民也。迨商

周之際。武王以尙父爲師。伐罪弔民。戮飛廉。誅崇侯。驅虎豹犀象而遠之。詩詠鷹揚。書記武成。具有明徵。周公爲相。制禮作樂。以致太平。凡祭祀天神地祇人鬼之禮。著於春官宗伯。永垂後世。洵撥亂反正之一大關鍵。宗教家謂爲龍華初度。正當此時。亶其然乎。周室東遷。天下大亂。聖如孔子。不得君相之位以行其道。周遊列國。落落寡合。退而設教杏壇。講明性與天道。賢人七十。弟子三千。亦收原之大觀也。秦漢以還。斯文日喪。至於東晉。士大夫放浪形骸之外。徒尙清淡。驕奢淫佚。成爲惡習。故釀成五胡亂華之慘劇。旌陽許祖起於江右。創淨明忠孝之教。松沙一度。學者景從。斬蛟蛇以除

民害。立道統以啓來世。樵陽讖記。已開龍沙之先聲矣。由松沙以來。閱至於今。千有五百餘歲。歐風美雨。咄咄逼人。新學囂張。風俗大壞。三綱五常。棄如弁髦。宗教神道。目爲荒渺。舉國若狂。變本加厲。在前清道光庚子。貫源譚子奉宗勳官之詔。道闡後天。壇開三教。存道存人。繫脈於黎郝袁雷。老道場所謂五大聖師是也。後有陳吳羅三師。竭力闡揚。十魔九難。未竟其功。上天震怒。將乩鸞光像。一概收停。賴中皇與孚佑帝君。及列位祖師。同立誓願。懇恩三天。源祖賞准。降詔昊天。乃於民國壬子。開香雲道統。牽貫籐橋。道接先天。中皇提權。都仙執掌道統。純陽執管籐橋。鍾陳韓白諸仙。護

道演道。各盡其職。闡教宗師身負道壇重任。期在度盡十萬靈根。以答天恩。不意辦至中途。忽遭魔考。道統遷於西湖。分爲西南兩派。惟三度道場。重在奉行詔旨。挽劫度原。名雖分派。其實一也。濟度開舟。限期亦復有定。黃胎佛種。盍速歸來。

濟度原始

嘗讀中庸有云。君子之道。造端乎夫婦。及其至也。察乎天地。可知夫婦卽陰陽。易曰一陰一陽之謂道是也。惟道雖昭在天地。而宏之則在乎人。我國道教。自太上以來。玉清正宗。已歷有十七代。其道脈源流。有同學樂子應禮編輯之原稿。業已校訂付印。自不復述。至於辦道須辦壇。而各壇又須有道場以爲之統率。則我現辦龍沙南派濟度之原始。不能不追述以曉大眾。俾明此中辦辦之締造艱難。由來已久。固非一朝一夕所可達到者也。

湖龍沙道場。前後共有三度。一曰闡度。二曰傳度。三曰濟度

。闡度道場。設於四川之重慶。傳度仍設同省之嘉定。名爲西派。濟度則移設浙江之西湖。名爲南派。實則前後雖有三度兩派之各別。而道脈總歸龍沙。如保奏提權者。爲關聖大帝。執掌道統者。爲旌陽真君。護應法統者。爲宏願沈祖。肩任闡教者。爲執陽宗師。引貫籐橋者。爲純陽呂祖。要皆爲龍沙會內。闡任護存。巡延演鑒之羣真。始終共盡救世之婆心。所以普闡大道而挽回浩劫者。至深且切。故曰三度歸從一度撐。無非一視同仁耳。

但在時期上。一度有一度之開始。一度有一度之結束。而此度與彼度復有過度之辦法。論闡度發源最早。始於民國之壬子年

。在巴西之香雲山。剏立統地。當日正屆普度時期。道壇兼辦。得王慧清開世師之躬親首倡。非不蒸蒸日上。無如任事諸子。競分堂派。意見不一。致遭魔攷。遂有道遷西湖之諭。是闡度卽伏濟度之根源。

及開辦傳度。自丁巳年起。至乙亥年止。其間歷史可分爲四期。始由香雲發脈。嘉凌分棧。爲第一期。繼於嘉定設立明道院。而嘉凌亦稱分院。旋由明道院改爲傳度道場。爲第二期。越癸亥。成都建三天樓殿於金沙寺。源醮成功。賜名明道總院。作西派傳度外棧辦事總地。一面又兼辦南派濟度事宜。而傳度道場遂成內地。爲第三期。至乙亥年冬。傳度全辦結束。爲第

四期。而要論主辦傳度道場。及傳度外棧兩處三天皇樓之全部事務。非經我胡常玄系道師之千萬艱辛。不克有成。而兼辦南派。猶在其次。是傳度已兼濟度之代辦。

綜而言之。就闡傳兩度之開始及結束。互相考校。傳度之時期自較闡度爲長。雖傳度中途亦有庚申之波折。幸不久即邀開復。其斡旋之力。固出自龍沙列聖之重發慈悲。而苟非有胡系道師隨時督率諸生。嚴恭寅畏。對於壇道雙方。各加整頓。必難速期感格。然則傳度中途之轉危爲安。系道之力。實不可沒。匪獨如此。即現主持濟度道場江子至返。奉命南來勦辦。亦深賴師提挈之功。固不僅繫屬西派。有代辦南派之勞而已。

以上爲闡傳兩度之過去概略。並傳濟兩度之過度情形。而欲追溯濟度在西湖獨立開舟。則亦匪伊朝夕。其中經過事實。尤應搜集分敘。以明源委。

一度原。查我龍沙大道南遷。度原道命。在闡度期間。雖屬有人來過。祇因傳道無壇。以致類多散漫。其入濟度範圍而得有歸宿者。實自江子至返於戊辰年九月奉諭赴滬引原始。但在丙寅冬會。已有四天命立願前來濟度引原。第一先出山者。爲黃子應綱。次年卽赴北平。閱三年度人無幾。至戊辰冬。奉系道命由北南來。始在滬開度。次爲談子應訥。三爲孫子應琇。四爲周子應瀝。最後有毛子應晏。而就滬杭秋月

春風兩仙房。稟奉祖師諭委者。則有汪子至燾。嚴子至濟。祝子至導。陸子至圖。謝子至實。如是在本道所管江浙兩省度原。得有師資。不致有求才異地之歎。

一立壇。考濟度之立壇原起。係就滬杭入手。滬上於己巳年三月。設明道學社。同年冬月。蒙祖師恩賜成爲秋月仙房。壇址在山海關大通路。杭地亦不久先設普濟學社。後成春風仙房。壇址在雷峯塔下夕照寺。當時仙房初立。諸事草創。多候聖諭而行。斗手一職。爲仙佛之喉舌。最關重要。幸賴有川來之常鬯至粹胡姓二子。彼此輪值。堪慶得人。所感不便者。名義上雖有兩仙房。實際上尙無統率之所。遂於辛未

年夏會。稟設濟度臨時籌辦處。附在春風仙房內。從中因覓房屋。費時不少。至壬申年五月初七日。租定江子之私宅樓梧別墅。濟度道場始告成立。地址即在雷峯塔下。前面南山。後濱西湖。洵稱勝境。場內設有四科等職員。辦事得所統率。嗣於甲戌年春季。南京成立濟度學社。今年丙子春季。外縣成立蕭山學社。揆厥現勢。可望逐漸推廣矣。再江子至返奉辦乾道。而亦領有兼辦坤道佛旨。曾先就杭縣謝子至實住宅。設立妙慶第一佛堂。繼就滬地姜子至錦住宅。設立妙慶第二佛堂。乙亥年九月十九日。在濟度道場後面。江子至返新起住宅。設立西來總佛堂。本年春間。復就蕭山縣丁子

至誠住宅。設立妙慶第三佛堂。同時又在杭縣武林門外湖墅舒子至懋住宅。設立妙慶第四佛堂。而前於甲戌年春。江子赴北平。就左子至景住宅。暫設臨時佛堂。度得坤道十餘人。尚不在正式佛堂統計之內。是寶蓮亦漸有興起之象。

一建醮 濟度建設醮典。已有兩次。第一次爲昊天醮。係壬申年二月初三日預告開啓。至十四日利幽功完。醮壇設在夕照寺。第二次爲窿天醮。係乙亥年八月二十九日預告開啓。至九月十八日利幽功完。醮壇卽本道場。惟第一次辦事。除主副祭外。有春風秋月兩仙房同人。及川中同學毛子應破。第二次辦事。除主副祭。及春風秋月兩仙房同人外。有南京

濟度學社同學。及川中同學江子應漢。論兩次辦事。人均不多。却幸大衆虔誠。吳醮旛篆「普濟」二字。恩批「惟德是輔」四字。窿醮旛篆「光昭下土」四字。玉批「至誠感格。允予留恩。」玄批「彰善瘴惡。禍福攸分」各八字。可謂荷天之寵。且按濟度道場佈置。原遵三天體制。設有源窿吳三層樓殿。現雖源醮尙未舉行。然自今年丙子春起。每月除戊日外。樓下昊天通明殿。敬誦玉皇經。樓上窿天彌羅殿。及源天開霄殿。敬誦玄祖經與琅函經。由有職各同學常期輪流。子夜起誦。經聲達旦。其餘各種品經。更由各同學分担認誦。川流不息。亦不可謂非因受寵而加勉。

要之本上三端之紀述。已歷九載之光陰。外觀僅立規模。內省殊多負疚。可謂難矣。茲者傳度期滿。濟度獨撐。川中自本年四月初三日開啓。至五月初九日完隆。定爲報恩三天大醮。主祭爲系道師。我道場江子至返亦擬在副祭之列。已奉祖師明諭。俟醮典完畢。卽擇期恭迎系道南遊。大闡玄風。值此濟傳兩度交接之際。正是我同學修身大好機會。願度已還須度人。至道貴有至德。當茲厄運。側身道場。不心存利濟。勉行功善。何以挽地劫而邀天恩。此近來所以有發起濟度善堂。推行外功。(如施醫、送藥、捨棺、義地、惜字等項。)藉挽厄運於萬一之舉。抑尤有告者。近而報恩醮之輔助。遠而源天醮之準備。

在在需人。亦在在需才。更望我同學視壇事如己事。誓了願如初願。共撐此普渡慈船。作上船之先導也。語云。道在人宏修在己。又曰。人身難得。大道難聞。今生錯過。曠世難逢。鄙人不敏。願以斯語爲勸告。

民國二十五年丙子春閏三月龍沙後學志猷吳靈犀敬述

濟
度
原
始

2

229003

229003